

# ENNAMULA KU KUSIIBA

أحكام الصيام - أوغندي



جمعية الدعوة والارشاد ونوعية الجاليات في الزلفي  
هاتف: 966 164234466 - فاكس: 966 164234477

## ENNAMULA KU KUSIIBA

### أحكام الصيام

#### Ennamula y'okusiiba

Okusiiba Ramadhan mpagi mu mpagi z'Obusiraamu ettaano, ku lw'ekigambo ky'Omubaka Swalla Llahu alaihi wasallama mu Hadiith eyawandiikibwa Imam Bukhaari ne Imam Muslim (nga yayogerwa Ibn Umar) nga Omubaka wa Allah swalla Llaahu alaihi wasallama yagamba nti:

((بني الإسلام على خمس: شهادة أن لا إله إلا الله وأن محمداً رسول الله،

وإقام الصلاة، وإيتاء الزكاة، والحج، وصوم رمضان)) [متفق عليه: ٨، ١٦].

*'Obusiraamu bwazimbibwa ku mpagi ttaano; okukkiriza (n'oyatuza n'olulimi lwo) nti tewali asinzibwa mu mazima okujjako Allah, era ne Nnabbi Muhammad mubaka wa Allah, n'okuyimirizaawo esswala, n'okutoola Zakah, n'okukola Hijja n'okusiiba omwezi gwa Ramadhan".*

#### Okusiiba kye kki?

Okusiiba kitegeeza okw'eziyizako okulya n'okunywa, neweeziyizaako n'okwegatta mu nsonga z'obufumbo, n'ebirala ebisiibulula, (byonna ebyo obyekuuma) okuva emmambya lw'esala okutuusa enjuba

weegwiira, era nga okikola ne nniya ey'okukusembeza eri Allah.

Okusiiba kuno okwa Ramdhan abamanyi beegatta ku bwetteeka bwakwo nga Allah bw'agamba mu Qur'an mu Surat Al Baqara: Aya 185, nti:

﴿فَمَنْ شَهِدَ مِنْكُمُ الشَّهْرَ فَلْيَصُمْهُ﴾ [البقرة: ١٨٥].

*"...kale nno oyo yenna abanga asangiddwawo omwezi (gwa Ramadhan) agusiibe..."*

Okusiiba kuno kwa tteeka ku buli Musiramu yenna akuze mu myaka era ategeera atali mulalu. Obukulu obutegeezebwa wano ye muntu okuweza emyaka ekkumi n'etaano oba okumera enviiri ku mubiri gwe mu bifo eby'ekyama, oba okuvaamu enkwaso (amazzi agazaala) olw'okwerootelera n'ebirala. So nga yye omukyala yeeyongelako okugenda mu nsonga zaabwe (haidwi), era omuntu w'afunira ekimu ku bino oyo abeera akuze mu Busiraamu.

### **OBULUNGI BW'OMWEZI GWA RAMADHAN**

Allah owekitiibwa omwezi gwa Ramdhan guno yagusukkulumya ku myezi emirala n'agussaamu ebirungi bingi ebitasangibwa mu myezi mirala, nga n'ebirungi ebyo mwe muli bino wammanga:

- 1.** Ba malayika ba Allah basabira omusiibi Allah amusonyiwe okutuusa lw'asiibulukuka.
- 2.** Mu mwezi guno sitaani enneewagguzi zikaligibwa ku njegere.
- 3.** Mulimu ekiro Allah mwe yagerera buli kimu (lailatul qadiri), nga ekiro kimu kisinga ebiro bya myezi lukumi (1,000) mu mpeera z'ekirungi ekiba kikoleddwamu.
- 4.** Abasiibi basonyiyibwa ebibi byabwe mu lunaku olusembayo mu Ramadhan.
- 5.** Waliwo ne Allah b'ata okuva mu muliro mu buli kiro kya mwezi gwa Ramadhan.
- 6.** Umura gy'okoledde mu Ramadhan empeera zaayo zenkana n'empeera za Hijja.

Era Omubaka swalla Llaahu alaihi wasallama yalaga obulungi buno mu Hadiith eyawandiikibwa Imam Bukhar ne Imam Muslim n'agamba nti:

قال ﷺ: ((من صام رمضان إيمانًا واحتسابًا، عُفِرَ له ما تقدم من ذنبه))

[متفق عليه: ٣٨، ٧٦٠].

*"Yenna asiiba omwezi gwa Ramadhan nga mukkiriza era nga asubira empeera okuva eri Allah asonyiyibwa ebyonoono byeyakulembeza okukola".*

Era yagamba swalla Llahu alaihi wasallama mu Hadith eyawandiikibwa Imam Bukhar ne Imam Muslim nti:

((كل عمل ابن آدم يضاعف، الحسنة عشر أمثالها إلى سبعمائة ضعف، قال الله عز وجل: إلا الصوم فإنه لي وأنا أجزي به (...)) [متفق عليه: ٥٩٢٧، ١١٥١].

*"Omulimo gwonna omwana wa Adam gw'akola gwongezebwa empeera ekirungi kikubisibwamu ebikifaanana emirundi kkumi n'okutuusiza ddala ku mirundi lusanvu, agamba Allah eyayawukana nti: okujjako okusiiba nze nkusasula (amakulu zzo empeera zaakwo teri ayinza na kuzibalirira wabula nze nzekka nze nzimanyi)".*

## **EBIKAKASA OKUTUUKA KW'OMWEZI GWA RAMADHAN**

Okutuuka kw'omwezi gwa Ramadhan kukakasibwa nga tusenziira ku kimu ku bibiri;

1. Okulabibwa kw'emboneekerera y'omwezi gwa Ramadhan (nga gubonese). Singa guboneka olwonno okusiiba kuba kukakase, nga bw'agamba Omubaka swalla Llahu alaihi wasallama mu Hadiith eyawandikibwa Imam Bukhaar ne Imam Musilim nti:

قال رسول الله ﷺ: «إذا رأيتم الهلال فصوموا، وإذا رأيتموه فأفطروا»

[متفق عليه: ١٩٠٠، ١٠٨٠]

*"Bwemulabanga emboneekerera (y'omweezi gwa Ramadhan) musiibe ate era bwemulabanga emboneekerera (y'omwezi ogwa Shawwaali) musibulukuke".*

Era wano kimala okukakasa okuboneka kw'omwezi gwa Ramadhan nebwaba omuntu omu yekka omwenkanya (nga mukkiriza atya Allah) nga y'agulabye, wabula kwo okuboneka kw'omezi gwa Shawwaali tukukakasiza ku kugulaba kw'abantu babiri era abenkanya naye omu tatumalira.

2. Okujjula kw'ennaku asatu ez'omwezi gwa Sha-aban, singa omwezi gwa Sha-aban gujjuzza ennaku zaagwo amakumi asatu, olwo oluddako lubeera lunaku olusooka mu Ramadhan, nga bw'agamba Omubaka mu Hadiith eyawandikibwa Imam Bukhaar ne Muslim:

(... فإن غُمَّ عليكم فأكملوا العدة ثلاثين) [متفق عليه: ١٩٠٧، ١٠٨١].

Yagamba omubaka swalla Llahu alaihi wasallama nti:  
*".....bwe guba gubikkiddwa (ebire ne mutagulaba) kale mujjuze ebbanga lya nnaku amakumi asatu eza (Sha-aban)".*

## ABALINA OLUKUSA OBUTASIIBA

Okusiiba kuno bwe kw'abeera nga kwa tteeka, ate Allah alina be yawaayo olukusa olw'okubulwa obusobozi obusiiba basiibulukuke, era be bano wammanga:

1. ***Omulwadde oyo asuubira okuwona*** nga akaluubirirwa okusiiba, omuntu oyo akkirizibwa okulya, oluvannyuma lw'okuwona n'aliwa ennaku ezo ze yalya. Wabula oyo abeera nga obulwadde bwe tebusuubirwa okuwona, oyo takakibwa kusiiba wabula yye aliisa omunaku omu buli lunaku ekigero ekyenkana kilo emu n'ekitundu (1.5kg) y'omuceere oba emmere ekozesebwa endala. Oba akyayinza okufumba emmere omulundi gumu n'ayita omuwendo gw'abantu ogwenkanankana n'ennaku z'aba aliddemu n'abaliisa.
2. ***Omutambuze ali mu lugendo;*** Ono omutambuze naye akkirizibwa okulya amangu nga avudde mu kitundu mw'awangaalira okutuusa lw'anakomawo mukyo. Ebbanga ly'amala nga taleese nniya ya kubeerera ddala eyo gy'alaze.
3. ***Omukyala ow'olubuto;*** Oyo naye akkirizibwa okulya singa atya nti bw'anaasiiba yye kenyini ajja kufuna obuzibu oba omwana oyo ayonka

oba ali munda mu lubuto. So nga singa okuyonsa kuno oba olubuto biggwa omukyala ono alina okuliwa ennaku ze yalya.

4. ***Omukulu mu myaka*** oyo akaluubirirwa okusiiba; oyo naye alina olukusa lw'okulya n'abeera nga aliisa buli lunaku omuntu omu mw'abo abateesobola wabula yye ono taliwa nnaku ezo z'aba alidde.

## EBY'ONOONA OKUSIIBA

Bino wammanga bye by'onoona okusiiba:

1. ***Okulya oba okunywa nga ogenderedde:*** Wabula singa omuntu alya oba n'anywa nga yeerabidde ekyo tekirina kye kikosa ku kusiiba kwe. Nga bw'agamba Omubaka swalla Llaahu alaihi wasallama mu Hadiith eyawandiikibwa Imam Muslim.

قال رسول الله ﷺ: ((من نسي وهو صائم؛ فأكل أو شرب فليتم صومه...)) [رواه

مسلم: ١١٥٥]

Yagamba Omubaka swalla Llaahu alaihi wasallama nti: "*Omuntu yenna eyeerabira nga asiibye n'alya oba n'anywa, ajjuze okusiiba kwe (amakulu agende mu maaso n'okusiiba kwe), kubanga Allah y'aba amuliisizza era y'aba amunywesezza*".



Era ne mw'ebyo ebisiibulula omuntu kwe kutuuka kw'amazzi mu lubutolwe nga gayita mu nnyindo, era n'okukozesa empiso ey'ebyokulya nga biyita mu misuwa n'empiso y'omusaayi, ebyo byonna byonoona okusiiba kubanga bibeeramu ekiriisa eri abeera asiibye.

**2.** Okwegatta mu mukolo gw'abafumbo, omuntu yenna eyasiibye singa yeegatta ne mukyalawe mu mukolo gwabwe ogw'abafumbo, oyo abeera asiibulukuse era alina okuliwa olunaku olwo ate era n'okuwa omutango, nga nagwo kwe kuta omuddu, oba tamusobodde kumufuna asiiba emyezi ebiri egiddirinjanye nga tasiibulukuseeko mugyo wadde olunaku olumu okujjako olw'ekisonyiyisa Obusiraamu kye bukkiriza, gamba nga ennaku za Idi ebbiri, oba ennaku z'okwanika ennyama, oba obulwadde, oba olugendo n'ebirala nga ebyo.

Singa asiibulukuka ewatali kisonyiyisa mu Busiraamu kalube olunaku lumu lwokka, oyo abeera atekwa okuddamu okutandika buto okusiiba asobole okutuukiriza Allah ky'atulagidde.

Singa eky'okusiiba abeera takisobodde, olwo aliisa (ba masikiini) abateesobola nkaaga.

**3.** Okuvaamu amazzi agekyaaama nga agenderedde olw'ensonga y'okunywegera

mukyalawe oba okugejjamu yye kennyini (masturbation) n'ebirala ebiringa ebyo, byonoona okusiiba era akikoze akakatwako okuliwa naye nga tawa mutango, so nga okwelooterera tekwoona kusiiba kw'amuntu.

**4.** Okuvaamu omusaayi olw'okulumikibwa, oba okugujjumu omuntu agugabe, wabula omusaayi omutono okuva mu muntu tekwoona kusiiba era wamu n'okuvaamu kw'omusaayi mu muntu nga omuntu tagenderedde nga ekiwundu oba okuggyamu erinyo, ekyo tekirina kye kikosa kusiiba.

**5.** Okusesema nga ogenderedde (okwegoga), wabula singa omuntu asesema nga tekubadde kwagala kwe tewaba buzibu agende mu maaso n'okusiiba.

Ebintu bino byonna ebisiibulula bye tulabye, tebisiibulula musiibi okujjako nga omusiibi akikozezza nga akitegeera era ajjukira nga yesaliddewo, wabula singa abeera nga abadde tamanyi kulamula kwakyo mu Sharia y'Obusiraamu, oba nga ebiseera abadde tabitegedde nga okulowooza nti enjuba tenavvaayo oba nti egudde n'ebifaanana bityo biba tebyonoona kusiiba kwe.

Nabwekityo okubeera nga ajjukira, singa abeera yeerabidde okusiiba kwe kuba kutuufu. Era

n'okubeera nga yeesaliddewo, singa abeera akakiddwa okusiiba kwe kuba kutuufu n'okuliwa taliwa.

**6.** Era n'ekirala mu byonoona okusiiba kwe kuvaamu omusaayi gwa haidhwi oba ogwa nifaasi, wonna omukyala w'alabira omusaayi guno ogwa haidhwi oguva mu mukyala ogwa buli mwezi oba ogwa nifasi oguva mu mukyala nga amaze okuzaala, w'alabira ogumu kugyo amanye omukyala nti awo olunaku lwe we lufiiridde (k'abeere nga abuzaayo lutemya lwa liiso essaawa z'okusiibulukuka zituuke) gyali okusiiba wabula atekwa kulya oluvannyuma n'aliwa ennaku ezo z'alidde.

### **EBINTU EBITOONOONA KUSIIBA**

1. Okunaaba omubiri gwonna, okuwuga n'okweyiwako amazzi olw'ebbugumo.
2. Okulya, okunywa n'okwegatta mu nsonga z'abafumbo ekiro okutuuka lw'okakasa okusala kwe mambya.
3. Okusenya nakwo tekulina wekukoseza kusiiba ne bwe kubeera mu kiseera kyonna eky'emisana, wabula ate kuli mu bintu ebyagalibwa okukolebwa.
4. Okwejjanjaba n'eddagala lyonna erya halali kasita libeera nga ssi lya kiriisa (amakulu

ekikozesebwa mu kifo ky'emmera), nabwekityo kikkirizibwa okukubwa empiso etali ya kiriisa, n'okwefuuyira mu maaso oba mu matu k'abeere nga omusiibi afunye obuwoomerevu bw'eddagala eryo mu mumiro. *Wabula eddagala erikkirizibwa wano, lirina okuba nga enkozesa yaalyo teriyisibwa mu kamwa oba mu nnyindo nga okumira empeke n'okutonnyeza amatondo mu nnyindo.* So nga okulindako n'olikozesa nga omaze okusiibulukuka kye kisinga. Era kikkirizibwa okukozesa ebinyokezebwa nga *bukhuuru*, era okukomba ku mmere yetegeleze omunnyu (naye n'atabimira) naky'o kikkirizibwa, naye akakwakkulizo okuba nga by'akombye tebigenda mu ddookooli lye kantu konna mubyo.

Era tekirina buzibu omusiibi okunyumunguza mu kamwa n'okufeesafeesa mu nnyindo, naye nga tasussa nnyo mazzi kuyingira wala olwokutya amazzi okugenda akantu konna mugo mu ddookooli, era tekirina kabi eri musibi kukozeza buwoowo n'okuwunyiriza ekintu kyonna ekiwunya akawoowo.

5. Omukyala ava mu haidhwi mu nnaku ze ez'abuli mwezi oba ava mu nifaasi mu musaayi gwe nga yaakamala okuzaala, singa omu kubo omusaayi

gukoma okujja ekiro, akkirizibwa okusiiba nga tannanaaba okutuuka mambya lw'esala, kye kimu n'oyo alina janaba, amakulu ne banaaba olw'okusaala esswala ya (Fajiri) Subuhi.

### **OKULABULA;**

- 1) Singa omuntu asiramuka emisana mu Ramadhan, kikakata ku yye okutandikirawo okusiiba ekiseera ekisigadde so nga takakatibwako kuliwa kiseera ky'alidde.
- 2) Omusiibi atekwa okubeera n'enniya y'okusiiba olunaku oluddako, agifuna mu kiro nga mambya tennasala ku kusiiba kuno okw'etteeka n'okwo okwa SUNNA MU'AKKADA (ennywevu), nga okusiiba ennaku omukaaga eza Shawwaali, n'olunaku lwa Arafa, n'olunaku lwa 'Ashuura. Wabula kwo okusiiba ennaku eza Sunna ezabulijjo, gamba nga ennaku essatu mu buli mwezi, zo zino enniya ekkirizibwa okugireeta k'ebeere nga Fajiri evuddeyo, wabula akakwakkulizo nga tannaba kulya oba kunywa kintu kyonna.
- 3) Kirungi nnyo era kyagalwa eri omusiibi okusaba ennyo edduwa mu kiseera ky'okusiibulukuka nga asaba kyonna ky'ayagala ku lw'ekigambo ky'omubaka

swalla Llaahu alaihi wasallama mu Hadith eyawandiikibwa Ibun Maajah nti:

قال ﷺ: ((إن للصائم عند فطره لدعوة ما ترد)) [رواه ابن ماجه: 1743]

Agamba swalla Lllahu alaihi wasallama nti: "*Mazima omusiibi mu kiseera ky'okusiibulukukakwe, alina edduwa etaddizibwayo*".

Era n'emudduwa z'asoma Omubaka swalla Llaahu alaihi wasallama zeyayigiriza; nga bwekiri mu Sunan Abi Dawuda egamba nti:

((ذهبَ الظمُّ وابتليتِ العروقُ وثبتَ الأجرُ إن شاء الله)) [أبو داود: 2010].

Agamba nti: "*Egenze ennyonta, ne gitotobala emisuwa era ne zikakata empeera, in shaa Allah*".

- 4) Omuntu yenna bw'ategeera nti Ramadhan omwezi gwabonese, kiba kya tteeka gyali okutandikirawo okusiiba kw'olwo olunaku, so nga abeera ajja kululiwa kuba teyavudde mu ntandikwa nga alina enniya y'okusiiba.
- 5) Kiba kirungi eri oyo alina ennaku ez'okuliwa okubeera nga ayanguwa okuziriwa olwokwejjako ebbanja amangu, so nga era tekiziyizibwa kuyye kukeerewa wabula tekitekwa kukeerewa kutuuka ku Ramadhan eddako awatali nsonga yonna ekkirizibwa, nga ekisonyiyisa mu Busiraamu. Era mu

kuliwa akkirizibwa okuziriwa nga azigobereganyizza oba okuzaawulayawula.

## **EBYA SUNNA MUKUSIIBA**

Okusiiba kulina ebintu nga biri Sunna mukwo nga nabyo bye bino wammanga:

**1.** Okulya ddaaku nga bw'agamba Omubaka swalla Llaahu alaihi wasallama mu Hadiith eyawandiikibwa Imaam Bukhaar ne Muslim egamba nti:

لقوله ﷺ: ((تسحروا؛ فإن في السحور بركة)) [متفق عليه: ١٩٢٣ - ١٠٩٥]

Agamba swalla Llaahu alaihi wasallama nti *"Mulye ddaaku, mazima mu kulya ddaaku mulimu emikisa"*.

Era nga kiri Sunna (kiriko empeera) okukeereya ddaaku n'ogirya mu kiseera ekisembayo eky'ekiro, nga era bw'agamba Omubaka swalla Llaahu alaihi wasallama mu Hadiith Sheikh Alban gye yayogerako nti ntuufu:

لحديث: ((لا تزال أمتي بخير، ما عجلوا الإفطار وأخروا السحور))

[صحيح الجامع: ٢٨٣٥].

Agamba swalla Llaahu alaihi wasallama nti: *"Ummah yange tegenda kulekayo kubeera mu bulungi ebbanga lye balimala nga banguyiriza okusiibulukuka ate ne bakeereya okulya ddaaku"*.

**2.** Okwanguyiriza okusiibulukuka oluvannyuma nga kukakase okugwa kw'enjuba, so nga era kiri Sunna okusiibulukukira ku kintu ekigonvu, bw'aba takifunye akozese entende, bw'aba tazifunye asibulukukire ku mazzi, bw'aba tagafunye asiibulukukire ku kyonna ekiba kimwanguyidde.

**3.** Okusaba edduwa nga osiibye naddala mu kiseera ky'okusiibulukuka, nga bw'agamba Omubaka swalla Llaahu alaihi wasallama mu Hadiith eyawandikwa Imam Bayihaqi egamba nti:

لقوله ﷺ: «ثلاث دعوات مستجابات، دعوة الصائم، ودعوة المظلوم، ودعوة المسافر» [رواه البيهقي وغيره].

Agamba Omubaka swalla Llaahu alaihi wasallama nti:  
*"Edduwa z'abantu basatu zaanukulwa; edduwa y'omusiibi, n'edduwa yomutambuze, n'edduwa y'omuntu alyazaamaanyiziddwa".*

**4.** Era ne mu birala omusiibi by'atasaana kuleka, kwe kuyimirirako ekiro mu Ramadhan, nga bw'agamba omubaka swalla Llaahu alaihi wasallama mu Hadiith eyawandiikwa Imaam Bukhaar ne Imam Musilim egamba nti:

لقوله ﷺ: «من قام رمضان إيماناً واحتساباً، غُفر له ما تقدم من ذنبه»



Agamba swalla Llaahu alaihi wasallama nti: *"Omuntu ayimirira omwezi gwa Ramdhan nga mukkiriza era anoonya mpeera okuva eri allah, asonyiyibwa ebyo byonna byeyakulembeza okukola"*.

Era kisaana eri omusiibi okujjuza eswala ya Tarawuya (Taraweeh) n'agisaala ne Imaam okutuuka Imaam lw'amaliriza nga bw'agamba swalla Llaahu alaihi wasallama mu Hadiith eyawandiikibwa bannanyini bitabo bya Sunna nti:

((من قام مع إمامه حتى ينصرف كُتِبَ له قيام ليلة)) [رواه أهل السنن].

Agamba swalla Llaahu alaihi wasallama nti: *"Omuntu ayimirira n'asaala ne Imaamuwe okutuusa lw'amaliriza, awandiikibwako empeera za muntu ayimiridde ekiro kyonna"*.

Era kisaana mu Ramadhan okuyitiriza ennyo okusaddaaka, era nga bwe kisaana okunyiikira okusoma Qur'an kuba omwezi guno ogwa Ramadhan mwezi gwa Qur'an wamu n'okubeera nga omuntu buli lw'asoma ennyukuta emu mu Qur'an afuna ekirungi ate mu buli kirungi kimu akubisibwamu emirundi kumi.

### **ESSWALA YA (TARAWEEH) TARAWUYA**

Tarawuya kwe kuyimirira ekiro mu swala nga muli mukibinja mu mwezi ogwa Ramadhan, nga n'ekiseera kyayo etandika oluvannyuma lwa Isha-i

okutuusiza ddala emmambya weesala. Singa emmambya esala, esswala eno ebeera eweddeko.

Era omubaka swalla Llaahu alaihi wasallama yatwagazisa esswala eno okugisaala raaka kumi n'emu, wabula singa omuntu ayongera ku kumi nemu tekiba nabuzibu era waddembe okusaala raaka bbiri bbiri nga bw'asaza salaam okutuuka lw'okomekkereza n'emu.

Era kiri sunna esswala eno okugisaala nga mpanvu obuwanvu obutakaluubiriza basaaze.

Era tekirina kabi konna n'abakyala okujja okwetaba mu sswala eno eya Taraweeh, kasita batuukiriza obukwakkulizo buno:

Bateekwa okubeera nga bajja kuwona ebikemo bya basajja.

Bateekwa okujigendamu nga tebeetonyetonye.

Bateekwa okubeera nga teboolesezza byakwewunda byabwe era nga tebeefuyidde buwoowo.

**OKUSIIBA OKWA SUNNAH**

Yatwagazisa omubaka swalla Llaahu alaihi wasallama okusiiba ennaku zino eza sunna nga nazo zeezino:

1. Okusiiba ennaku omukaaga mu mwezi gwa Shawwali; Agamba swalla Llaahu alaihi wasallama mu hadith eyawandiikibwa Imam musilim

لقوله ﷺ: «من صام رمضان، ثم أتبعه ستاً من شوال، كان كصيام الدهر» [رواه مسلم: ١١٦٤].

*"Omuntu asiiba omwezi gwa Ramadhan oluvannyuma n'agoberezaako ennaku omukaaga eza Shawwaal, abanga asiibye omwaka omulamba".*

2. Olunaku lwa Bbalaza n'olwokuna.

3. Okusiiba enaku essatu mu buli mwezi n'okusingira ddala (ennaku enjeru) nga nazo lwe lwekkumi ne satu, kumi nannya ne kumi nattaano.

4. Olunaku lwa Ashuurah nga nalwo lwelunaku olwe kkumi mu mwezi gwa Muharramu. Kirungi n'osiibayo olunaku olubereberye lwalwo (olwomwenda) oba olunaku oluvannyuma lwa lwo (olwekkumi n'olumu) osobole okwawukana kuba Yudaaya. Nga bw'agamba omubaka swalla Llaahu alaihi wasallama mu hadith eyawandiikibwa Imam muslim nti:

قال رسول الله ﷺ: (( صيام يوم عاشوراء، أحتسب على الله أن يكفر السنة التي قبله )) [رواه مسلم: ١١٦٢].

*"Okusiiba olunaku Iwa Ashuurah afuna okuva eri Allah okusonyiyibwa ebyonoono by'akoledde mu mwaka gwonna oguwedde".*

5. Okusiiba olunaku Iwa Arafat; Nga nalwo lwe lunaku olw'omwenda mumwezi gwa Dhul-hijja. Agamba omubaka swalla Llaahu alaihi wasallama mu hadith eyawandiikibwa Imaam musulim nti:

((صيام يوم عرفة، أحتسب على الله أن يكفر السنة التي قبله، والسنة التي بعده)) [رواه مسلم: ١١٦٢].

*"Okusiiba olunaku Iwa Arafat ofuna okuva eri Allah okusonyiyibwa ebyonoono by'okoledde mu mwaka oguwedde n'omwaka ogujja"*

**ENNAKU EZITAKKIRIZIBWA KUSIIBWA**

Munnaku ezaatuziyizibwa okuzisiiba mwemuli zino:

- 1.** Ennaku za Idi ebbiri, Idi Al-fitiri ne Idi Adhuha.
- 2.** Ennaku z'okwanika ennyama (Ayamu Tashiriki) ziba Satu, olwekumi n'olumu n'olwe kumi nebbiri n'olwekumi nessatu mu mwezi gwa Dhul-hijja, wabula nga mu batakkirizibwa kuzisiiba muvaamu omuntu akoze Hijja eya Qiiran n'owa Tamattu-u nga tebafunye busobozi busala bisolo, kuba bbo bano baalagirwa okusiiba.
- 3.** Enaku eza Haidhwi ne Nifaasi eri abakyala.
- 4.** Okusiiba kw'omukyala okwa sunna nga bba waali n'atafuna lukusa lwa bba. Nga bw'agamba omubaka Swalla Llaahu alaihi wasallama mu hadith eya wandiikibwa Imaam Bukhar ne musilim nti:

*"Era tasiiba nga omukyala yenna olunaku lwa sunna nga bba waali okujjako nga amaze kufuna lukusa okuva gyali, okujjako Ramadhani".*